



Mountainbike Masterplan - credit pel concept da realisaziun

La regiun da l'Engiadina Bassa, Val Müstair e Samignun han laschè elavurar ün «Mountainbike Masterplan», chi prevezza d'investir ils prossems ons in tragets da mountainbike. Pel Cumün da Zernez esa previs investiziuns i'ls contuorns dal Pass dal Flüela. La suprastanza ha approvà in ün prüm pass il credit per l'elavuraziun d'ün concept da realisaziun.

Trafic public - avegnir da la lingia da bus tanter La Punt e Zernez

La lingia da bus „lingia 7“ da La Punt fin Zernez e viceversa es deficitaria e da andit a discussiuns. La suprastanza ha approvà il credit per realisar ün stüdi da variantas per l'avegnir da la lingia da bus tanter La Punt e Zernez. L'incumbenza pel stüdi es gnü surdat a la firma Rapp Trans AG e vegn finanziada eir da la regiun Maloja e da l'uffizi d'energia e da trafic dal Chantun.

Zernez Energia 2020 - proget d'accumpognamaint da la scoul'ota a Lucerna

In october 2018 ha gnü lö ün lavuratori ingio chi d'eiran preschaints commembers da la suprastanza cumünala e da la cumischiun Zernez Energia 2020 sco eir trais collavuratur da la scoul'ota da Lucerna. Al workshop sun gnüdas eruidas pussibilitats per pudair activar e far gnir plü cuntshaint il proget sainza stuvair dovrrar massa bleras resursas. La scoul'ota da Lucerna es gnüda incumbenzada d'elavurar üna proposta sco cha'l proget Zernez Energia 2020 as dess sviluppar in avegnir. La suprastanza ha approvà il credit ed ha dat glüm verda per cumanzar il proget.

Zernez Energia 2020 - tablas d'infuormaziun

In connex culla promoziun dal proget Zernez Energia 2020 ed il premi d'energia vaiva la cumischiun Zernez Energia 2020 decis da vulair signalisar ils abitaculs, chi sun gnüts sanats energeticamaing, cun tablas d'infuormaziun. Quista masüra dess esser ün augmait implü per l'acceptanza dal proget Zernez Energia 2020. La suprastanza ha acceptà la dumonda da credit per realisar las tablas d'infuormaziun.

Progets – diversas dumondas da princip

La suprastanza cumünala ha trattà ed approvà il cumanzamaint dals seguaints progets: sanaziun ed ingrandimaint da la chasa da scola Zernez, sistem da controlla da l'aua da baiver, progettaziun sanaziun sarinera Zernez, sanaziun da la via da god Arduond a Zernez, sanaziun dal provedimaint d'aua da l'Alp Barlas-ch Suot a Brail, sanaziun dals mürs da sustegn da la punt dal Spöl a Zernez. Quists progets sun gnüts approvats in radunanzas cumünalas i'ls ons scuors. Cun quistas approvaziuns s'haja dat glüm verda a la realisaziun dals progets chi vegn manada da la direcziun operativa.

Zona da quietezza temporara per la sulvaschina - Laviner dal Müt fin Val da Barcli

Il guardgiasulvaschina da Zernez e l'uffizi da chatscha e pes-cha dal Grischun han dumandà al cumün da pudair s-chaffir üna zona da quietezza temporara per la sulvaschina i'l cuntegn dal Laviner dal Müt fin Val da Barcli. La problematica es cha personas s'avicinan in quist cuntegn a la sulvaschina per fotografar o lura da prümavaira per ir in tschercha da cornas. Id es gnü decis da laschar ir in vigor quista zona da quietezza temporara a partir dals 11 favrer fin als 15 avrigl 2019.

Radunanza cumünala dals 28 marz 2019 – tractandas definitivas

La suprastanza cumünala ha approvà la glista da tractandas per la radunanza cumünala dals 28 marz 2019. A quista radunanza vain preschantada la revisiun parziala da la planisaziun locala da la protecziun da las auas. Plünavant eir la planisaziun locala da seguondas abitaziun cun inventar d'objects.

Statistica sezzüdas, radunanzas e votaziun 2018

Il chanzlist ha orientà a la suprastanza sur da la quantità da sezzüdas e tractandas da l'on 2018. La direcziun operativa ha trattà 527 tractandas in 25 sezzüdas, percenter ha la suprastanza cumünala trattà 242 affars in 17 sezzüdas. In trais radunanzas cumünalas han votantas e votants decis davart 18 tractandas. Dürant l'on 2018 haja dat quatter votaziuns a l'urna.